

食貨典第一百八十卷

漕運部藝文四

清口靈運記

明蘇茂相

國家歲轉東南數百萬之粟以實天府皆出淮安清口以達于北清口者黃與淮交會處也黃濁淮清必淮定抵黃流始無壅天啟丙寅春茂相奉璽書來董漕務五六月間南旱北霽淮勢弱黃河挾雨驟漲倒灌清江浦高郵之墟久之泥沙淤澱清口幾爲平陸僅中間一泓如線數百人日挽不能出十艘茂相大恐或曰金龍四大王最靈因遣材官周宗禮禱之是夜水增一尺翼日雨復增二尺雨過旋淤茂相曰非躬禱不可閏六月二十有五日至文武將吏詣清口禱於金龍四大王及張將軍神祠四大王黃神也祈遜淮勿侵張將軍淮神也祈捍黃勿縮是時旱日熾卽一泓如綫者亦幾絕流羣議開天妃壩開烏沙河張郡丞元弼來言曰神憑人言無事倉皇還繇舊道衆未之信越五日七月朔晨風清朗已而涼風颼颼陰雲滃鬱不移時大雨如注達夕不歇初二日雨如之河流澎湃停泊千餘艘懼呼而濟淮遂強能刷黃迄秋糧艘盡渡無淹者衆始詫河神有靈還繇舊道語非

誣僂漕徐夢麟侍御駐京口正淤是虞當午憑几河神見夢詳具侍御清淮紀夢錄嗚呼我皇上以聖明踐祚水府百神莫不受職龍飛之歲黃河清數百里而漳水之濱傳國璽韞泥淖中數千年者且耀采呈祥矧河泊之浮漕艘濟國儲乃其歲歲而司存者受命如響又何疑乎方茂相禱時言運濟如期則當爲新廟貌請加褒號至是運竣疏聞乃命張郡丞採堪輿家言改其廟向而新之云皆天啟六年丙寅重九日

請折運疏

汪敬

臣聞國家之賦民也取之於其地之所有不責以其地之所無卽責之以所有而猶酌地之遠近以爲等故則壤成賦著之禹貢而百里納總二百里納銓三百里納秸四百里粟五百里米其不槩取而無別如此此堯舜之治所以如天而百世稱君道之隆也恭惟太祖高皇帝以至仁育天下富有四海當時定賦惟蘇常爲重其餘若徽州寧國則不皆然在徽州則地磽土瘠一畝所入不穀六斗而又米粒粗糙米色紅雜幸而歲豐所入可飽半年餘皆取於浙江江西等處率二鍾而致一石太祖龍飛之時親履其地見其土瘠若此民苦若此故於粟米常賦以十分爲率三分本色存留府縣

七分折收解京而又下蠲租之詔首太平次徽州次寧國七歲之間詔爲三下民雖艱食而幸免流離此太祖所以奠鴻基而裕畿輔也列聖相承守爲祖制邇以邊圉多事京儲告急六軍有脫巾之呼責徽州所納折米改作正米每年差府縣管糧官部領糧長運米至臨清京通二倉上納夫徽非米鄉也民間之食尙仰四方京倉之儲豈能他貸故自改米而後部糧之官不及終任往往以罷軟見黜而小民一當糧長身亡家破聯延扳累并及親鄰甚至有賄賂難前始而逃亡繼而自斃昔人所謂十家而九者臣竊謂其十家而十也夫徽非謂不當納米也實不能納也非有米不納也實無米可納也臣以不才蒙恩任使日在臨清拮据朝夕見他郡之苦納者每爲之惻然平斛減量俾受朝廷一分之賜及至收徽之交納見部官之疲勞糧長之狼狽輒爲之屏食垂淚歎小民欲懃而無從用是輒敢冒死與小民陳之伏乞敕下該部詳議將徽州近所改本色糧米豁爲折色改作輕齎每石定銀若干歲解戶部雖不得盡如國初折絹布之輕而亦不至如今日供本色之重其於國計民生實兩便焉

奏爲實據沿途所見直陳雇募民運一款因籌通漕永利以釐漕弊以裕關課事臣竊惟今日事勢莫急于漕考先朝運法因時制宜凡幾變自長運之法一定年完一年軍民兩利不謂近歲漸至稽遲臣本年正月以起復來京比聞沿江一帶奉官捉船蓋爲前番運船未回當事者因以雇募一法爲變通接濟之計尋聞船戶有颺帆走者有棄船者有沈河者臣始不信及臣船近南京地方有不知姓名者若干人哄擁臣思漕事重大以情理慰遣之遂止因歎此時民困已極我皇上無一念不以爲民無一事不以爲民卽令官家需船運糧原出雇募不謂州縣奉行無法遂至搶攘且近日沿江征兵捉船裝送已自難堪此等窮民不識忠義不曉權宜一日見父母妻子衣食無賴豈得不逃且臣鄉自蕪關至留都宣課司至許墅凡三關每年該稅額銀若干若船隻一逃商載必減商載一少國課必虧此法之必不可不罷亦不得不罷所不俟再計者也然則爲漕計者奈何凡行法必考其初壞法必覈其故同一漕艘也同一漕官也昔何以蚤今何以遲謂何乾而昔年未嘗加溢謂船少而昔年未嘗加多今有司果能實實遵冬兌春開之制乎沿河諸臣果能實實行掘泉撈淺之法乎督運官果能實實使官旗沿途效命過洪如期到灣如期回空如期乎數者皆漕之大利大害一

有差池遂致淹滯今漕撫實心任事稱一時廉正名臣伏乞皇上申諭專委除本年變通接濟完糧外以後停止雇募察通漕船數若干額設急急蚤修新添急急併議興除聽其斟酌出入聽其便宜要必使年完一年以復舊制也至于災傷殘破地方因時因地議折議蠲是又漕政通融潤澤之大端而臣猶有請焉臣鄉江南北各屯運軍其領兌水次撥本處者猶知守法一撥他處其臨兌橫索辱官毒民不可問併乞皇上勅下漕撫察照先年改撥事例令本處軍運本處糧庶軍家無遠地變亂之憂民家無客軍刁難之苦臣敢因籌漕之事而併及之臣在戶言戶不敢不據沿途所見實實奏聞臣曷任惶悚待命之至

漕政解懸記

羅大任

蓋在漢高帝時運山東芻粟給中都武帝因之乘富強之資取縣菟樂浪城朔方輦四方金粟從而甘心焉維時鄭當時始議引渭入河而漕運以興唐開元以後歲運至百什萬計臣劉晏饑怒爲懷江渭安流國用贍足汴宋漕政分爲四路理宗朝益泗漕餉邊軍而漕渠以開高皇帝定基金陵給餉薊遼獨行海運至永樂九年潘叔正議復會通河運道告成朝廷仰東南轉輸歲數百萬而北漕

遂什伯於南漕此漕事關國家大計至亟也江以西置令長者七十六州邑而漕額浮于他道其在吾豐尤稱爲繁爰是豪民因緣爲姦揆厥從來有更僕未易數者郡司馬陳公之來視邑事也問民所疾苦于南北漕利弊爲之目曰苦累偏枯等之癰疽疔羸宜補元氣蓋邑中踐更之役數困于南北二漕先是民家編是役者一艱于衛軍胥役一艱干涉江遠運民之豪且力者壁而觀若奪晉鄙軍而得志于東諸侯若江黃小國不能達于王而貢其尺籍以列蒲璧然利害雖不相償猶獲以玉帛見焉近歲以來每遇權衡徭役當事者不能却請託蓋設兵增餉勢不得不倍編倍編則役重于產役重于產則轉徙而破產破產不足以供公私之費身家性命與歲役俱盡而無良之民又蠹賊聚姦反覆在手且繼之興戎公用是奮然曰若憚言興除不著遠覽之見將見民困而上無獲矣於是進豐人士爲條爲計一定以官解民收改絃易柱而張之利興害革綱舉目張數十年來蠹者剔蠹者息舞文翫法者斂跡縮手盤辟而戢于威乃具列其事於省大僚罔不復曰汝戕虐是懼施實德於民民悉銘感知報若崩厥角曰大夫實植我嘯黍谷而春日我吾儕小人弗戡其世歌舞焉屬者旱魃爲虐秋將無禾公法甫出而甘霖隨霑遂大有秋所謂神之聽之好是正直非歟善乎襄城

董子之論養馬也曰去其害馬者而已夫燒剔刻烙羈梏飭孰與去其甚者之爲利也公之於漕政意蓋如是耳況吾邑歲困兩漕如聾盲痿痺煩冤潰耗其患之成而積之久也若安於其數一遇盧扁爲之撤蔽去翳還聰明運動之用始知聾盲痿痺之去體也向非公發良策於熟計去宿弊於一朝亦安見其算無遺策樂衰衣美誨植耶漢郡都尉秩比二千石以云賢倨則然矣然多任郎佐史察舉吏又武健自將故都尉之賢無傳公起家郡貳丰采經術號稱長者可以傳矣其他美政班班爲烈行且以上計入告將有如龔少卿黃次公徵爲治行第一者比歲以來國家多故東南之民敝於轉漕天子或思鄭當時劉晏潘叔正其人公當在儲言儲曰臣昔經理漕政於豫章劇邑也藉手以獻必有可否達時務巨細中機宜者余願得一次第其事如今時之紀頌不忘者爾

改運白糧疏

黃希憲

切白糧爲上供急需遞年僉點糧解春辦兌納相沿久矣邇因民窮財盡百弊叢生半爲包棍侵漁半爲胥役捐索以及剝淺守凍赴京交納等費動以千計一承此役鮮不家破人亡遂至靡歲不遲無邑不欠院道府縣降罰頻仍咨檄提催絡繹踵至官民並受其困公家正額究無完結之期若不

亟爲變計不幾淪胥以亡乎近奉聖諭渙頒凡可寬恤吾民者無不周悉臣撫此財賦重地目擊苦役顛連敢復隱忍膠柱不求爲恤民裕國之長策乎近行蘇松道會同常鎮道通盤打算徹底講求思甦民裕國之策莫善于均徵米而官運之官運則民無雇倩之費一便也官無僉役之難二便也錢糧旣自官支吏胥無從抽扣三便也在船皆官役船戶無敢凌虐四便也催餉皆官事沿途無敢拋撇五便也況米屬均徵則苦樂之形不立巧拙之情自化糧不必詭寄飛灑差不必就易避難民心以厚民風以淳六便也然其中有當議者五焉凡白糧正耗春辦夫船等米一槩算入平米之內派之此派糧之公可行也原編耗米之外另編加二以補沿途之消損以平米一石計之不過合勺而已此加耗之輕可行也民間辦糧盡數交倉無此漕彼白之分縣官就完米中擇其乾潔者交協部官動支春辦交割總部完辦啟行先可免漕艘阻壓之患此徵辦之速可行也運船向係民雇官運則必用官船計每船管船頭舵水手各安家衣資等項以及買辦包索過淺起剝過溜添簷等項計每船用米五十石用銀三百二十五兩以原編夫船貼役米計之除支外米尙有餘以原編夫船貼役銀計之除儘支外銀尙不足以有餘之米當不足之銀臨時調劑是經費不煩增設矣至於管

押起交侵盜漂失每船各有責成遇有虧欠立勒賠補懸大法以繩其後蓋既不可以復向糧里則人未有不愛惜性命者是責成不患無人矣茲據蘇常兩道臚例具詳臣亦無容更益而臣緯恤杞憂尙有不能已於言者語曰一法立一弊生外而衙蠹包棍內而部胥積歇引戶每視糧解爲奇貨今改爲官解未免拂其狼心必至多方阻撓或包棍潛入京師串通積役仍肆把持或引戶交搆外姦偽造訛言動搖耳目有一於此皆足爲害乞勅五城御史及緝事衙門凡遇此等卽置重典庶蠹賊一清而美利可久伏願皇上軫此子遺毅然乾斷勅部立覆舉行異日書之史冊曰崇禎十六年江南苦役得甦復覩太平景象將皇上如天好生之德與穹壤俱無極矣

復折奏疏序

侯嗣曾

國家下數萬艘以轉漕江南惟嘉定得免蓋其地無一粒之產無大河之通故終弗可以漕漕之敝而民皆流亡議欲廢縣者自成弘之後也縣不可廢漕不可免而姑議以鑑代者自萬曆初也蓋自我啟家以來歷見邑漕因改之情于今三世自萬曆之二十一年始定永折爲令而先曾祖叅政公叙之又至于天啟之四年議者復欲改漕以備軍興父老哀請中免而先府君太常公叙之又至于

今天子之十五年復議漕復折如初而予又得序之此六十年以來民生之休戚略可觀而予齒且衰矣方萬曆之言漕也當是時法令疎闊府庫尙充鄉薦紳先生盛于朝邑舊令或仕于京師熟知而畢圖之宜其易也今天下蕭然繁費天子焦思竭慮於上大司農厠足避罪于下一邑之利害彼非不知顧有所不暇恤者也譬如四體焦糜而呼一指之痛人必不以爲然是故皆難之初復漕之詔下閩邑震恐莫不思掘屋壞田奔走驅竄司理伯屏倪公來署吾邑謀所以卒圖之則曰斯事體大非熟識款繁而悉忠以圖勢必不能得于是特請諸生張子石行張子行而上其書天子以爲然下諸職者熟議之議上竟得復免著爲令他邑勿得比焉嗚呼蓋聖人之心視通萬里其恤之備其察之詳旋議旋復一惟乎民命之安危而初不以成言定是故反覆推較寧暫緩關門五萬餘石之餉而終不奪我嘉然則吾輩今日猶得以長男子女守有此土者皆朝廷始終覆蓋之仁賢使君竭蹶圖救之心江南劬勞安宅之福輻輳交會而得以保此也以守關之重不易吾嘉則其他軍興之緩于此者可知矣以粟芻繁亟之時而終無所累則異日寇平天下無事其蠲除給復又可知矣是豈不尤幸也歟若張子者千里叫閭炊烟斷絕不避勞險絮誠濟公要爲難能也詩曰凡民

卹救之是不可不謂之卹卹者歟夫爲民請命功成而不言賢豪長者之業也導揚聖明宣悟閭里矧大夫之事也鑒其所以因察其所以革永守成憲無輕建易計臣之責也予原夫因改利害而爲之序非獨論其世亦將以告後之人

白糧官運疏

陸清原

雲南道監察御史臣陸清原謹題爲北運業有經久長策臣鄉冀邀一視之仁仰祈聖明廣推浩大以蘇積困以惠窮黎事臣聞邸報見應天巡撫黃希憲北運當極敝之時一疏奉聖旨白糧覈點滋擾包棍胥役歲滋侵蠹種種積弊委宜釐正奏內照畝均派專官督解及覆近裁員缺等議誠裕國便民長策該部速與議覆欽此臣捧讀忭舞有以仰窺皇上之周悉民隱恩覃蔭屋也夫北運至今日而疲困甚矣如覈點之鑽營而漏富坐貧也如包棍之盤踞而誤公蝕私也如抽扣之侵漁而名存實亡也如總協之公費而科派多端也如胥舍之虎視而勒索不休也如船戶之凌詐而逼借無厭也如引戶之包納而違制橫加也如漕壓之難越而剝費浩繁也百千艱苦誠有繪圖難盡者至邇年以來在在起剝節節提淺一解數年浮費不貲室家如洗性命隨之總捕魏通判因糧無措而

仰藥聶同知續委受事而掛冠官之慘至此民之痛可知今幸應撫詳計聖聽如流特允照畝均派專官督解釐從前之積弊畫百世之長算載在簡編光乎史冊行見蘇松常三郡之遺民欣欣有起色矣但嘉湖與三府其糧派大約相同而罷累亦彼此不異今三郡特蒙官解而嘉湖尙仍民運是受困不與三郡異而受恩未與三郡同當亦聖明所不靳均施者臣備員侍從目擊雨露洪敷而能不爲桑梓請命乎謹比例上陳乞敕該部將嘉湖二府照蘇松常一體議覆官解併移咨撫按確核經久良規庶聖明惠養窮黎之德意遍滿東南矣抑臣更有請者十三年分嘉湖二府糧解一運三年時日既久起剝復多米之在途者偷竊去其半潯爛去其半彼十二年以前已蒙蠲免十四年未經起解亦蒙改折三分獨十三年分介在兩年之間奇荒異苦跋涉到京欲終事而不得仰丐聖明矜憫俯照十四年改折之例量與蘇息在皇上正是改本爲折不虧國課在窮民各得以銀代米生還有日於以再生兩郡非淺鮮也事關民生大計謹瀝誠上告伏祈聖明俯鑒施行

漕運部藝文五

詩

送元中丞轉運江淮

唐王維

薄稅歸天府輕徭賴使臣歡霑賜帛老恩及卷綃人去問殊官俗來經石蚌春東南御亭上莫使有風塵

奉送劉相公江淮催轉運

錢起

國用資戎事臣勞爲主憂將徵任土貢更發濟川舟擁傳星還去過池鳳不留唯高飲水節稍淺別家愁落葉淮邊雨孤山海上秋遙知謝公興微月上江樓

漕舟

宋劉攽

漕舟上太倉一鍾且千金太倉無陳積漕舟來無極畿兵已十萬三陟戍更多廟堂萬濟帥將奈東南何

贈漕幕趙居甫

劉宰

儀真在昔發運司承平舊事猶可稽歲漕東南六百萬石米自准入汴趨京師周原六轡光陸離建臺想像因遺基水浮陸走舟車輳轉輸十九資殘寇古今事異雖可悲民力已困國不支長才入幕宜深思皇華使者須良規

通漕引

元王惲

漢家鼎定天西北萬乘千官必供億近年職貢仰江淮海道轉輸多覆溺東阿距泉二百八瀕濟西來與清合安流取直民力省積水浮綱纔兩聞自昔河防爭橫議祇辦薪芻不勝計宣房瓠子至今悲以彼方茲功極細役徒三萬期可畢一動雖勞終古利裹糧荷鍤去莫遲行看連檣東過蘄休說春潭得寶歌長笑韋郎空侈麗從今粒米斗三錢狼藉都城樂豐歲

送浙省都事曹德輔運糧北上

明貝瓊

屯田未開歲未熟白粳一金纔一斛將軍初下山東城使者復轉江南粟颶風五月西南回黃龍朱雀一時開雷霆夜撻海若死雲霧晝合天妃來黑洋北去五千里直沽近接金河水內廷傳勅賜宮壺侍臣出報龍顏喜

運夫謠送方文玉督運

邊貢

運船戶來何暮江上旱風多春濤不可渡運船來戶何暮裏有閭外有灘斷篙折纜愁轉盤夜防蟲鼠日防漏糧冊分明算升斗官家但恨倉廩貧不知淮南人食人官家但知征戍苦力盡誰憐運船

戶運船戶爾勿哀司農使者天邊來

夜宿毘陵聞輓舟聲有感

萬表

歲漕萬艦涉關河險阻身親勞慮多今日毘陵成病臥不堪夜聽輓舟歌

閩南旺湖有感

張文鳳

一坡新漲此來遊往事還驚父老眸三日甘霖如雨玉萬夫扑舞欲椎牛復湖本自宸衷斷蠲稅頻分赤子憂漕事告成民告病璽書專重若爲酬

漕渠奏績歌

賈三近

憶昔沛中雲色愁驚濤萬頃隨陽侯漂沙坼岸留孤樹風雷競怒滄江秋蛟龍近郭鷗鷺喜一望洪川暮煙紫郡國尺書走飛電帝寵司空導河水天上秋馳元武車遙分劍履臨淮徐旋沈白馬投玉璧登山重啟元彝書元彝使者授真訣爲掃徐關白浪滅金繩照日生榮光獨抱元圭奏芳烈留侯祠前煙水平歌風臺下野雲晴中流飛輓自來去河洛千年同頌聲

寄謝餉部遼左

湯顯祖

中郎萬里寄軍儲海餉登萊似國初若道全遼堪郡縣只消家令幾行書

兌運歌爲無爲守紹渠何公賦

沙汝礪

濡須九月閒人少舟車絡繹鳳陽道運米中都給羽林萬竈全資一州飽陸地無倉吏不收風吹雨濕民懷憂米若湮爛倍徵急富者賣田貧賣牛六詔何公官鳳倅旦擊民艱思釋累中都亦有解北漕達輸河濟民飭勞易地兩宜人莫講兩地呻吟天聽高一時天子選循良拜公太守臨州堂鳳民濡民皆赤子計令易地輸倉箱兌運殷勤訴民苦公牘上陳幸報可兩郡疲民就便宜萬口歡呼公活我濡民舟出花林津往返不過半日程昔何勞苦今何逸轉移只在賢侯心

清口靈運咏

蘇茂相

河靈果不欺風馬載雲旗川漲連朝雨信符五日期漕艘浮浩蕩國庾裕京坻捍患應崇報封章奏玉墀

送王戶部督餉延綏

延綏舊在綏德控制河套爲易今在榆林失險矣

董應舉

米珠草桂駱駝城一線魚河百萬兵不信受降終隔虜可能綏德更移旌黃沙漠漠笳聲壯朔氣淒